

Ár 1982, miðvikudaginn 13. október, var í málinu nr. 6/1982 kveðinn upp af Yfirfasteignamatsnefnd svohljóðandi

ú r s k u r ð u r :

Málavextir eru þeir, að með úrskurði Yfirfasteignamatsnefndar frá 20. febrúar 1979 var því slegið föstu, að Félagsstofnun stúdenta væri óskyldt að svara fasteignaskatti af Nýja Garði við Hringbraut, nema að því leyti sem þar hefði verið rekið hótél. Með bréfi dags. 15. júní 1982, var þess óskað af hálfu Reykjavíkurborgar, að Yfirfasteignamatsnefnd tæki nefndan úrskurð til endurskoðunar og úrskurðaði, að skyldt væri að greiða fasteignaskatt af Nýja Garði. Er þessi krafa nánar rökstudd í nefndu bréfi og þar sérstaklega vísað til forsendna Hæstaréttar í dómi, uppkveðnum 11. júní 1982.


Í greinargerð Félagsstofnunar stúdenta frá 24. september s.l. er því mótmælt, að rök séu til þess að endurskoða ofangreindan úrskurð Yfirfasteignamatsnefndar, og er það sjónarmið nánar rökstutt í greinargerðinni.

Samkvæmt þeim upplýsingum, sem fyrir liggja, búa ekki aðrir en háskólastúdentar á Nýja Garði, að frátöldum hótélgestum, þegar hótél er rekið. Leigutímabil er bundið skólaárinu að öðru leyti en því, að nemendur, sem hyggjast þreyta haustpróf, fá sumarvist á Nýja Garði. Með hliðsjón af því og að öðru leyti með vísan til þess, sem segir í úrskurði nefndarinnar frá 20. febrúar 1979, eru ekki efni til þess að taka kröfu Reykjavíkurborgar til greina.

Ú r s k u r ð a r o r ð :

Ofangreind krafa Reykjavíkurborgar er ekki tekin til greina.


Pétur Stefánsson


Torfi Ásgeirsson

Haukur Hafstað

